

Directora di Museo Arqueologico, Bibi Ruiz

Exposicion “O Aruba, nos Baranca tan Stima” ta incentiva publico pa pensa



ORANJESTAD - Diaranson anochi a keda inaugura e exposicion “O Aruba, nos Baranca tan Stima”, organisa dor di Museo Arqueologico Aruba y MetaCorp den cuadro di 25 aña di Status Aparte, y 35 aña di nos Himno Nacional.

E acto aki a conta cu presencia di Gobernador Interino di Aruba, sra. Ella Tromp-Yarzagaray y Minister di Cultura sra. Michelle Winklaar, y demas persona invita cu a disfruta di un bunita apertura den forma di teatro y danza di e expo aki cu ta refleha e creatividad di e pueblo Arubano for di Prehistoria te Era Moderno.

Directora di Museo Arqueologico di Aruba, sra. Bibi Ruiz ta resalta e ambiente “excelente” cu a rondona e acto di apertura oficial di e exposicion. El a wordo habri di un forma sublime pa un grupo di hoben talentoso bou guia di John Freddy Montoya. El a bisa cu Museo Arqueologico ta masha contento y masha agradecido na MetaCorp cu a bira e partnership den un relacion sector publico-cultural y sector priva pa realisa e exposicion aki.

Sra. Ruiz tabata masha emocional di por a bira realidad e exposicion aki cu el a califica como uno informativo, atractivo, y moderno exhibi den un

espacio importante a laga tur hende hopi contento.

“Tin un publico grandi y un publico entusiasmo, nos no por pidi mas, nos ta hopi agradecido”, asina directora di Museo Arqueologico a bisa.

E exposicion aki ta hobi bon hinca den otro no solamente ta ser destaca e parti historico of arkeologico, sino evolucion y desaroy di Aruba, te hasta cuestionamento riba e prijs halto cu a wordo paga pa nos desaroy y con lo bira nos futuro.... Sra. Ruiz a bisa cu esaki tabata e intencion entre otro di e exposicion aki. E ta considera cu museo su tarea no ta di mostra solamente, sino di puntra e comunidad ki bo kier, unda bo kier bai, wak bo pasado y kico bo ta pensa riba bo futuro.

Riba e aspecto anterior Museo Arqueologico ta considera cu nan a haya un partner splendido den MetaCorp cu a permiti nan no solamente pone e parti di historia, pero tambe incentiva e publico pa pensa: Esaki ta loke nos tabatin, kico nos tin awor y kico nos kier pa futuro.

E comision di diseño cu a traha riba exposicion a insisti pa no solamente mostra potretnan bunita, pero tambe sembra un inkietud cerca e publico. □

